

慎  
柔  
五  
書

# 序

士生於叔葉不能希志軒冕又不  
能遂逸丘樊其或隱身以利物混  
俗以弘道往往以技顯于時史家  
列方伎日者倉公並傳劉歆較中  
秘書占候醫方並載七畧一則定

猶豫于幾微一則採譖危于呼翕  
學醫乎學卜乎吾學醫矣予自壬  
午逮乙酉間連歲作客幾罹兵革  
者數矣廼退而懸壺市上予豈妄  
誕哉恃吾爰石氏瑞章爲之依表  
也然予之知瑞章繇于先知有胡

氏慎柔慎柔以醫隱于僧物故者  
十年矣予交之在二十年之前先  
是吾師熊魚山先生夫人得奇恙  
隨宦遊遍叩青囊終無濟者予推  
轂慎柔竟以六劑奏效再數劑全  
瘳自是予與慎柔同客于先生松

陵治所者一年旣得朝夕領緒益  
又盡收其枕匣之秘得抄本盈尺  
辛未年予北遊太學攜之麓中會  
魚山先生以黃門罷歸思慎柔不  
可得見欲盡索其書予不敢私而  
紫編丹笈自吳入燕者又自燕入

楚矣尋又遭寇獷狷先生挈家遷  
播聞其書已久沒兵火中廼慎柔  
卽有另本亦已星散不可問比年  
來予與瑞章友善每與促席研究  
醫旨兼諸家之長深望洋之歎青  
過前人玄成奧帙然終于不忘所

自口慎柔不少輟而虛怯一門尤  
推獨步遂出其遺書卽予向所授  
受者也予爲慶幸及感慨者久之  
瑞章遂謀之菑梨蓋傳其學傳其  
人起膏盲于未形驅府俞之沉患  
瑞章之業廣矣瑞章之慶長矣瑞

章齒少于予其學窺淵海宿儒不能過刀圭入口僵者立甦所在戶外屨滿所著述甚博麗名諸生身故在隱顯之間予則灰心將以越人老矣惟瑞章有以導予

專尹顧元交書



慎柔師小傳

石震

師毘陵人胡姓本儒家子生而敏慧稚年寄育僧舍長尋薙髮法名住想字慎柔性喜讀書凡一切宗乘以及儒書經史子諸編無不究覽心血耗疲得瘵疾幾不起時查了吾先生寓醫荆溪師往求治歲餘獲痊了吾先生涇縣人爲太平周慎齋先生高座師頽悟沉靜了吾先生深器之欲授以已學師繇是執贄事先生十餘年先生懼其學識過已廼令往從慎齋先生與薛理還偕行理還亦毘陵人子于已卯春曾

識荆于嘉禾時年已逾七十因出了吾生平所驗案  
及禁方贈予予自此益盡窺了吾之學慎齋先生名  
滿海內從遊弟子日衆師隨侍每得其口授語輒筆  
之先生初無著述今有語錄數種行世多師所詮次  
也師自是歸里治病輒應履日盈戶外然性好施雖  
日入不下數金而貧如昔歲庚午吳江宰熊魚山先  
生夫人抱奇恙六七年矣延師至以六劑奏效一時  
薦紳士大夫咸服其神明因往來吳會間里居之日  
少歲壬申予時習岐黃家十餘年雅慕師每相過從

談論輒達曙忘倦師每愼生平所學嗣者寥寥言之  
恍然然竊謂師貌古神闇當得永年亡何丙子仲夏  
忽示疾以手札招予授生平所著書凡虛損一癆瘵  
一所劓記師訓一治病歷例一醫案一又數日竟脫  
然去年六十五距今又十年矣予將以其書壽之于  
梓因爲之傳

師訓題辭

石震

師訓者查了吾先生塵頭之言而慎柔述之者也刻  
慎柔五書而先之以師訓者誌所自也應酬駁劇隨  
感隨發非著撰也晨昏風雨隨聞隨述非箋疏也故  
其言多直率而不文其詞章多瑣屑而無脊然正如  
道家之丹源禪家之宗旨得其單辭片語即可該貫  
萬理今又錯綜原文依類連舉稍加序秩無倫次而  
畧有倫次使學者便爲觀覽焉是編出不但慎柔祖  
述了吾之言在是而慎齋先生之源流亦可窺豹一

題辭

斑矣

慎柔五書卷之一

毘陵

石 震瑞章父 訂正

顧元交專尹父 編次

師訓第一

地黃丸爲腎家之主劑。蓋腎水枯則肝木不榮。木不榮則枯木生心火。故用熟地以滋腎。用澤瀉以去腎家之邪。則地黃成滋腎之功。腎所惡者土也。脾家有濕熱。則能剋腎水。故用山藥補脾。用茯苓以去脾家之濕。則山藥成補脾之功。木枯則耗水以

山茱萸歛火以潤肝火熾亦能涸水以牡丹皮瀉心火而補心心足則火不妄起且下降與腎交而補腎之功愈成矣此卽難經東方寔西方虛瀉南方補北方之義又素問亢害承制之道也

凡兩手俱數大便燥者八物湯洪大有力地黃湯無力大補湯脾燥加山藥脉弦加芍藥右關浮無力加丁香沉無力加乾姜

內傷寸脉大于尺脉此陽脉盛也宜用保元湯加歸芍引下則大脉去而陽氣亦內收矣此從陽引至

陰分之法

內傷右尺弦弱不宜用寒涼以命門火虛故也

右關緩有力緩則爲濕又寸尺弱者用補中湯加赤茯苓仁蓋補中補寸弱赤茯苓仁行中焦濕又能使中焦之氣下行而尺脉自和

右關緩無用參苓白朮散加黃芪以補上而益下凡在右以四君子湯加減欲上用黃芪欲下赤茯苓仁在左以四物湯調理若左寸洪有力加水通黃連赤茯苓之類蓋木通瀉小腸火小腸爲心之府



黃連瀉心赤茯苓者赤入丙丁也

左關浮用羌防左關沉有力用山梔柴胡知栢之類  
左尺有力加知栢以瀉其有餘蓋左有瀉而無補  
右有補而無瀉則命門火重矣

凡內傷發熱口乾乃下焦虛寒火不歸元陽氣在上  
故耳須溫下焦使陽氣下降則口乾自愈

凡內傷火在上水在下故發咳嗽而喘此皆滋陰降  
火所致也初用桂製白芍吳茱萸少許及甘艸人  
參五味半夏破故紙仲一溫則火下行水上升

如或作瀉。則陽下行而胃中所積宿食水穀行焉矣。

凡虛損肺脉大。氣喘。下部脉弦細弱微。此皆陽上越。而不降。內寒外熱。上熱下寒之症。用人參一錢。桂製白芍一錢。乾姜三分。半夏一錢。五味十五粒。甘草生炙各二分。使溫中內收陽氣降下。

凡人病服寒涼剋伐過多。以至三陽氣衰。致痰凝氣滯。以調元之劑治之。陽氣一動。則少陽先升。少陽欲先出。前有太陽。後有陽明。遏截不能伸。少陽之

氣至太陽。太陽與之併。則寒與陽明併。則熱。遂成寒熱瘧狀。非真瘧也。其太陽氣達。遂有傷風之狀。鼻塞惡風寒之症見矣。陽明氣達。則有作瀉之症。此時正當調脾補元。分頭施治。則舊病盡脫矣。

凡服寒涼剋伐之過。遂成血凝。氣滯。用溫補之劑。其痰血決行。脈氣漸和。須預言將來或有凝血少許。此乃通經氣壯而血行也。

凡脈細數。腎虛弦數。肝虛短數。肺虛此爲病重之脈。有胃氣則生。無胃氣則死。

散數則爲心虛諸數之中尚有舒徐和緩之意者是云有胃氣也。

凡虛損脈數十數至尚不細短按之有一條者可服獨參湯一二兩然後調理。

虛損大便燥者用杏仁枳壳蘇梗則能去宿糞。

凡脾脈細弦而澁則中氣虛寒宜溫直用溫藥則火起須益智溫之更用山藥以養脾則益智之溫退居下焦補命門火則火生土遂成連珠之補而火不起矣。

嘗診一人脉右關浮大。乃陽氣浮上症。當中寒。果然。肚疼作瀉。宜用建中湯收陽入內。而中溫矣。

凡持齋人。所食之物皆滲淡。所食之油皆屬火。滲淡。瀉陽。陽虛則火起。此東垣云。持齋之人多胃虛。

凡久病用補脾補命門之藥。皆燥劑。須用當歸身以潤肝。恐燥能起肝火故也。

一痰症。曾有人病癡。寸脉不起。脚冷。關脉沉洪。此陽氣爲痰所閉。宜升宜降。宜開。用紫蘇。陳皮。半夏。赤芍。茯苓。枳殼。乾葛。石菖蒲。遠志。人參之類。其病

欲言而訥。但手指冷。此乃痰閉陽氣之病。後宜歸脾湯去棗仁圓眼黃芪加石菖蒲遠志半夏一補一開一行。後用全料歸脾湯久自愈。

病人久虛。內有宿積舊痰。用參朮補之。久乃吐出臭痰。或綠色痰。當不治。蓋積之久而脾胃虛極不運。故鬱臭耳。

一人常夢遺。診其脉。關中有動脉如大豆圓。此痰凝中焦。幸夢遺免鼓症。且寸尺俱不起。補中加茯苓半夏石菖蒲亦一升一降之道也。

一人以悲鬱。先前五六月倦甚。尋得癡症。只以手空  
指人。問爲何。曰我欲言而不能也。診其脉二尺微  
而不起。二關洪緩。此陽鬱而不能升。不能降也。用  
二陳湯加人參以開痰。助脾益以升柴。助陽石菖  
蒲。遠志赤茯苓以利濕。降痰降火。四劑卽安。後服  
九劑而愈。

吐血症。初六脉俱洪數。須用茯苓補心湯。蓋白茯苓  
能守五臟真氣。能泄腎中伏火。能瀉脾濕以健脾。  
二三劑後。數脉稍退。尚洪。以地黃丸納氣。洪稍減。

至弱。以四君子加減。補脾生肺。肺生水之義。如或見血。加牡丹熟地。右關有火。加山藥。左關有火。加山茱萸。左關左尺有火。加茯苓澤瀉熟地。

一人吐血後。右關尺洪大。便燥口乾。用白芍甘艸人參蘇梗歸身各五分。枳壳五分杏仁四粒黃柏二分。二劑下卽潤。諸証卽退。

凡欲止吐血。須炒黑乾姜五味子二物。以乾姜性溫。且血見黑卽止。五味子味酸。能收逆氣。

一人頭面俱痛。服寒涼藥多。其脾胃脉細澀。左尺亦



瀉。左寸關洪。此下焦寒而火邪逆上之故也。用羌活五分酒炒。防風三分酒連。一分酒。苓三分。白茯苓一錢。人參二錢。甘艸五分。半夏一錢。破故紙一錢。枸杞子一錢。二服。脉卽粗而不細而頭痛亦除。治梅核氣。用四七湯。加人參一錢。乾姜三分。細辛二分。桂芍一錢。半夏一錢。此皆下氣散痰。溫中升陽之劑。非細辛之升陽上焦無陽則痰氣焉能得動。凡癆症病。須用金銀藤葉煎湯藥。如肺虛加保元五味子。心脾虛歸脾湯。六脉俱有火而虛。八珍脾肺

虛補中腎脉洪大地黃湯。

凡病人嘔用補脾下氣之藥。其中須用當歸錢許以潤其下枯。蓋氣在上火而不下。下無津液。故用潤之。然脾胃虛而嘔者。又忌當歸。

五月火月。六月濕月。火旺則生濕。二者相并。肺受剋。則熱傷氣而痿倦之疾作矣。故設清暑益氣之法。黃芪助肺。人參助元氣。甘草瀉心火。則元氣復而肺氣清。濕熱盛而胃氣不清。故加蒼朮。濕熱在中而飲食不化。故加陳皮青皮以開胸膈。加神曲

以助消飲食。小便赤澀。加澤瀉以去下焦之濕。口渴加乾葛以解肌熱。又能接胃家津液。上潤胃家。濕熱盛則腎水受剋。加黃柏以裨腎水。濕熱盛則陽氣遏而身熱。加升麻以升陽。又走表以益陽。而門冬清心。五味欽肺。恐濕熱傷肺故耳。

五苓散爲四五月時令之藥。蓋濕熱盛則三焦氣不清。上咳。中滿。下瀉等症作矣。猪苓清上。焦茯苓清中。焦澤瀉清下。焦恐濕盛而脾不化。故用白朮以健脾。然陽氣不到則濕不去。譬如日所不照之

處地不易乾。用官桂之辛。升至表。引表之陽氣入裏。裏得陽氣而濕卽行矣。此方可升可降可吐。欲吐。先煎前散。冷飲。次服熱湯一碗。卽吐。欲利小便。溫飲。欲發汗。熱飲。

時至秋初。陽氣下墜。因夏初之濕熱尚在胸中。而有痞滿不寬之症。須用金不換正氣散。以去濕濕去。則金清。金清則降下之。令復。譬如主人久不在家。家中爲穢汚所塞。須掃除穢汚。以俟主人回之意。截瘧方用白朮五錢。當歸三錢。陳皮二錢。雄丁香五

枚烏梅三枚母丁香四枚水一大碗浸露一宿五  
更去渣取汁溫服蓋凡火瘡則內傷五藏俱虛內  
起火發熱火所畏者水也以水浸藥略溫服之則  
火見水而火退矣火退則諸藥能成功白朮補脾  
當歸潤肝陳皮消痰丁香溫胃烏梅欬肺潤下其  
病痊矣露宿以收清陽之氣五更服者子一陽生  
至寅三陽足矣

凡右開浮緩此陽氣在上中已虛寒主肚疼之疾秋  
來主有瘡痢蓋內已虛寒受邪已深至秋陽氣下

降入腹而正氣已旺。宿邪不能容。故發此二疾。邪輕則瘧。重則痢。皆正旺而邪退故也。

瘧疾二尺細。此下焦寒也。飲下則瘧可以去矣。不然亦成脹。

凡豁大脉久病。按下尚有渾渾一條。此陰陽未離。猶可治之。若下無一條。開在兩邊。此陰陽已離。決不可治。此脉常主作瀉。蓋豁大陽虛不能固。下而陰與陽不相合。故下不禁而作瀉也。

凡久病人。脉大小洪細沉浮弦滑。或寸浮尺沉。或尺

浮寸沉但有病脉反屬可治如久病浮中沉俱和緩體倦者決死且看其面色光潤此精神皆發于面決難療矣

凡肝脉細餘脉和緩周慎齋用補中湯加枸杞卽愈以枸杞補肝故也

凡寸脉大陽邪勝則病者亂而言神陰脉勝則病者亂而言鬼

病重藥宜輕宜少只以固中劑三四味漸漸取效由陽寸脉大于尺脉此陽脉盛也宜保元湯加歸芍

引下則大脉去而陽氣亦内收矣此從陽引至陰  
分之法

大抵吐極難醫瀉極難醫

凡从病左尺浮大宜補肺氣須保元加白芍白茯苓  
之類蓋金能生水之義

大抵病在上宜求之下在下宜求之上

凡用藥有用味留氣者須熱飲爲妙倘有畏服熱藥  
者以水洒藥面上卽氣收在内是留氣也

凡四時之令皆有寒熱溫涼有及時來者謂之正令



譬如春宜溫而反寒。謂之不及。春宜溫而先熱。謂之太過。宜溫而寒。用香蘇散解之。如當春得正令。夏初反復瘳峭。其春初之令未除也。猶宜香蘇散解之。倘春遇極溫。卽爲太過。則口渴舌燥之症見矣。第發熱而不惡寒者。謂之溫病。此溫令之過。治有溫病條說具。四時各有時令之病。各有時令之藥。咸以此類推之。

若夏時四五月正當夏令。而寒凜凜猶春初之意。香蘇猶不免耳。若當時小便赤口渴等症見。此時

令症也。宜五苓。清暑益氣十味香薷之類治之。若當時不熱。至秋七八月天氣暑熱。人患前症。仍以前湯治之。是治其不及之症。而調其不及之候也。譬如春天正令三月溫和。偶或風寒大作。卽有感冒傷風寒之症。若五六月正令大熱。偶或大雨遍地。塵熱之氣。爲寒雨逼入人家。卽爲受暑之症。宜清暑益氣湯解之。

凡診老人及病人。六脉俱和緩而浮。二三年間當有大病或死。何也。脉浮則無根。迺陽氣發外而內盡。

陰火也用保元或建中服之則陽氣收于內卽反見虛脉或弦或澀此真脉也宜炤脉用保元助脾之劑脉氣待和病亦尋愈壽有不可知者

大凡內傷症下俱虛寒

凡病肺脉浮大卽喘用溫脾飲肺之藥飲不下則成脹旣飲下肺脉猶大則成癰若遍身發瘡浮大無妨矣右關浮大則肚疼建中飲之則已飲不下則底痛皆內傷之症

歷例題辭

石震

語云。百聞不如一見。固有著書盈棟。而見之施行。則膠瑟罔效。宋義譚兵。非不娓娓。而一用輒蹶。曾不如一小卒之久于行間者。迹所睹聞。恒爲七書韜畧所未經道。此無他。其所閱歷然耳。慎柔之學。旣深入慎齋了吾兩先生之室。則于虛勞兩症。宜爲顓家所謂得訣回來。千書萬軸。數言可了。更爲躬行體驗。要語無多。發前人之未發。開後人之津梁。慎柔固有益于今古哉。故爲刻虛勞歷例。次于師訓云。



慎齋五書卷之二

毘陵

石震瑞章父訂正

顧元交專尹父編次

醫勞歷例第二

嘗治虛損脉緩五六至。但咳嗽發熱無惡寒。喉痛喉梗等症。以爲可治。服保元四君之類十餘劑。咳嗽畧可熱亦微退。至二十劑外。咳嗽反甚。熱又如故。而身反不能展側。兩足漸無力。至不能行而足蹠。此何也。緣下焦腎氣衰憊。而百骸間無津液涵溉。

且陽氣不能四達脾肺之氣不能下輸故足無力而踈雖藥有效病雖暫減終不治也

嘗治虛損六脉俱數有神而和緩雖數十餘至不妨可治初用四君加黃芪五味子十數劑後數脉漸減仍帶和緩意可治之若退出細如絲尚數決不可治又有退出如絲而不數此猶有胃氣無肚疼作瀉而飲食如嘗亦可保元參朮調理二三年愈然所云服藥後數脉漸減和緩有神爲可治者亦須三月見功年半方全愈又須看年力之衰壯及

精神脾胃之強弱也。若服藥後脉雖和緩而腿足漸無力如前所述。且痰嗽不止。脉雖緩治之無益焉。然或如前症足雖無力而熱已退。嗽減飲食如平人。此脾氣尚強。猶可遷延歲月。又有如前症六脉俱和緩。服前劑熱退而脉漸弦。反作瀉下血。此平時經絡留血爲火熱煎熬而成者也。下半月或十日五日自愈。下血時能飲食不死。不能飲食精神倦怠死。可立待其用藥健脾保元氣爲主。腹痛脉弦。理中湯。惡心飲食少。六君子湯。無此二症用

四君保元治之。蓋下血者邪氣從下竅而出也。又有變作傷風狀者。邪氣從上竅而出也。宜溫肺助脾之藥。亦得半月而愈。又有六脉俱和緩數八九至。服前劑先右三脉退去二三至。左脉尚數不退。是右表先退。左裏未退也。至數脉盡退。病將痊愈。左脉猶比右脉多一至。足見表退而裏未和耳。難知云傷寒以左爲表。右爲裏。雜病以右爲表。左爲裏。信然。

慎齋師嘗云。凡病求汗不出者不治。虛損六脉俱數。



服。滋。陰。降。火。之。品。不。及。四。五。十。劑。者。猶。可。治。之。如。  
服。至。數。十。劑。及。百。劑。者。真。元。耗。盡。雖。脉。大。洪。緩。中。  
已。無。神。因。用。補。劑。卽。退。去。洪。緩。變。爲。細。數。卽。漸。痿。  
困。不。起。而。斃。矣。戴。人。年。少。不。妄。服。藥。易。治。正。此。謂。  
也。又。或。服。寒。涼。未。多。用。保。元。四。君。加。生。姜。一。二。錢。  
一。二。十。劑。求。汗。不。出。而。洪。緩。之。脉。不。退。亦。屬。難。掇。  
或。雖。無。汗。而。洪。脉。漸。減。病。亦。漸。去。且。能。飲。食。此。無。  
妨。矣。如。此。脉。大。抵。秋。冬。易。治。春。夏。難。療。也。

凡虛損三四月脉雖數尚和緩六七至若逢春夏火

令津液枯稿。腎水正行。死絕之。鄉肺絕。脾燥。無有不死者。若秋冬火令已退。金水正旺。脉雖數。可治也。然使病者骨立。喉啞。喉痛。寒熱。脉細數。肚疼。作瀉。亦不治。如前症。欲求治。初用補劑。病當反重。何也。病已延至三四月。服藥已多。其不效者。必過用寒涼。病者五藏愈虛。邪火愈熾。初用補劑。或數帖。或一二十帖。邪火一退。反覺頭眩。惡心。骨疼。腳酸。神氣昏懶。不思飲食。倘脉不細數。而帶和緩。急用保元四君。大劑連服之。便安寢。半日。或一日。驟覺

卽精神頓爽再一劑再寢飲食漸增則可治矣倘  
脉細如絲肚飽昏瞶卽屬難治

凡虛損病久脉雖和緩未可決其必療蓋久病之人  
元氣虛弱脉氣和緩者假氣也遇七八月間服補  
劑病得漸減此生機也或延至十一月一陽初動  
陽氣漸升內氣空虛無以助升發之機則變增寒  
壯熱服補劑十餘帖寒熱漸退猶可延挨調理至  
二三月不變得生矣否則不治緣春夏木旺脾肺  
火病氣衰不能敵時令矣

嘗醫新病。或痢。或雜病。初時有邪。脉浮數。用按病藥。數劑。數脉卽退。病亦向安。再數劑。卽倦。脉反覺浮。數。此時不可謂尚有邪也。蓋邪退而神氣初轉。故浮。只宜保元湯養元氣。浮數之脉得微汗而退。此廼陽氣升。元神足。而邪自退之法也。倘不識此。仍以祛邪之藥治之。精神日損。肌肉日消。久之變爲虛勞矣。

凡病遇時節。則變換不定。或又加者。蓋遇時節。則天地之氣。或升。或降。而人身之氣。亦應之。病者精氣

尚冲猶能與時令相應。若元氣久虛之人。無以助升降之氣。上升則頭眩嘔噦。下降則足熱身寒。反爲氣候所牽。而身不能爲之主矣。

脾胃病十分虛。死于初春。亦有望春而死者。八分虛。死于孟春。五六分。死于仲春。及醫之不得其當者。雖原無死道。而業已醫壞。至季春不能換矣。清明前後二三日。尤爲不爽。

肺腎病。起于春。十分虛。死于初夏。亦有望夏而死者。八分虛。死于仲夏。六分虛。死于季夏。

凡久病服藥後六脉俱和。偶一日診之。或細或數。或虛弱。或變怪異嘗。卽當細問起居之故。或有一晚不睡而變者。或因勞碌惱怒。或感冒風寒。各隨其感而治之。治之而脉終不和。此爲難治。一晚不睡。或勞傷者。則用補中助元。傷飲食則用鹽湯探吐。後以二陳加減消食之品佐之。若房勞者。脉雖變而病不加變。猶可以平日調補之劑治之。倘病與脉俱變。調之不和。決難揀矣。秋冬尚可異。倖春夏萬不可爲。若傷暑者。宜少撤帷閉。以治暑法治之。

若冒風寒以溫肺加風寒藥散之一二劑卽和乃  
可若不轉亦在不治大都易于秋冬而難于春夏  
亦觀人脾胃元氣而消息之不可輕忽妄許人以  
易治。

嘗治一產後婦人素有勞症一年前以八物湯愈然  
連連綿綿未爲全去次年得產正癸亥屬戊癸化  
火之年天氣炎甚時醫雖用人參仍以山查能解  
參毒間之致寒熱作瀉予診之脉數九至尚不短  
用保元加乾姜熱附一分四劑數脉退減再清晨

診之。按下浮緩。但去着骨。指下細弦如絲。數脉如  
故。予曰不可爲矣。彼懇求不已。用桂製白芍五分。  
炙艸五分。參芪各五分。作建中湯之意。服至八劑。  
數脉退幾六至。又四劑。幾五至。彼以爲愈矣。遂止  
藥。至四五月後。脉轉弦細而歿。此案有禪前論。  
故附之。



虛損門題辭

石震

虛勞兩字。世皆僞倂言之。不知症有不同。治有相戾。予幼年初聞慎柔之教。輒云損病自上而下。勞病自下而上。損病傳至脾至腎者不治。勞病傳至脾至肺者不治。以勞法治損。多轉泄瀉。以損法治勞。必成痿促。于此之涇渭不明。而情焉以怯病該之。其能免于南轅北轍之相左乎。丹谿立相火之旨。惟以四物滋陰。陰陽之義。久爲晦塞。內經益火壯水。分別之理。豈好爲多事哉。嘉隆間。薛立齋先生出。而醫學于丹谿。



方得一變。慎齋先生嗣出。而醫學迺得再變。至我慎  
柔。乃爲集先聖賢之法。及授受之源流。以虛損勞瘵。  
截然分爲兩門。而金匱家始煌然再添一炬矣。天近  
代原氣論一書。以先後天分陰陽。卽以先後天立治  
法。余竊謂先天固有損者。非後天損之。無以致病。後  
天旣損之矣。而先天又何能無損。治先天者。治後天  
耳。豈能捨後天而治先天。愈立愈與。總原作者非真  
寔。生平得乎。說玄說奧。何益也。簡而脩明。而確。其在  
此編乎。

慎柔五書卷之三

毘陵

石 震瑞章父 訂正

顧元交專尹父 編次

虛損第三

脉法

脉經曰。脉來軟者爲虛。緩者爲虛。微者爲虛。弱者爲虛。弦者爲虛。細而微者。血氣俱虛。小者。血氣俱少。仲景要畧曰。脉芤者爲血虛。沉小遲者。脫氣。又曰。血虛脉大如葱管。

又曰脉大而芤者脫血。

慎齋先生云。浮大脉見于右尺。爲假火。假火按內傷施治。

凡損病脉數。爲胃氣不足。若轉緩弱。卽胃家生發之兆矣。左尺微細不起。右尺帶數。或浮大。調治非二三年不愈也。

緊數之脉。表裏俱虛。緊爲寒傷衛。數爲血不足。

脉緊則肺氣不足。不能衛皮毛。而畏風寒。脉數則陰虛火動。脉緊有胃氣。脉數無胃氣。

內傷作瀉而肺脉豁大者難治。

病久脉弦者轉瘡方愈。脉緩者轉痢方愈。蓋久病得氣血活動故轉病也。脉數不得汗卽生腫毒方愈。兩尺無脉是濁陰在上。痰凝氣閉肺不下降。金不能生水而成痰厥。經曰上部有脉下部無脉其人當吐。吐則濁痰湧出上部。疏通肺氣下降于腎。少陰上升于巔而有生發之機矣。

仲景云陽脉濇陰脉弦當腹中急痛。尺爲陰寸爲陽。陰脉弦水挾木勢而侮土也。陽脉濇者濇爲氣有

餘。是氣分有伏火也。火鬱在上。水盛在下。故腹急痛。

寸口脉微。尺脉緊。其人虛損多汗。此陽弱也。衛氣弱。名曰牝。榮氣弱。名曰卑。牝卑相搏。名曰損。

寸口脉微而濇。微者衛氣衰。濇者衛氣不足。衛氣衰。面色黃。榮氣衰。面色青。榮爲根。衛爲葉。枝葉枯槁。而寒慄。欬逆唾腥。吐涎沫也。

跌陽脉浮而芤。浮者衛氣衰。芤者榮氣傷。其身體瘦。肌肉甲錯。浮芤相搏。宗氣衰微。四屬斷絕。

寸口脉微而緩。微者衛氣踈。踈則其膚空。緩者胃氣實。實則穀消而水化也。穀入于衛。脉道乃行。水入于經。其血乃成。榮盛則其膚必踈。三焦絕經。名曰血崩。

跌陽脉微而緊。緊爲寒。微爲虛。微緊相搏。則爲短氣。少陰脉弱而瀡。弱者微煩。瀡者厥逆。

跌陽脉不出。脾不上下。身冷膚鞭。

少陰脉不至。腎氣微。少精血。奔氣促迫。上入胃隔。宗氣反聚。血結心下。陽氣退下。熱歸陰股。與陰相動。

令身不仁。此爲尸厥。當刺期門巨闕。

脉見短數。則無胃氣。細數。緊數。俱非吉脉。

洪大按之下者。虛損之脉。

凡虛損之脉。命門火旺。腎水不足。心火尅金。木燥土乾。五火交熾。若用知栢之品。滋陰降火。是猶乾鍋紅烈之中。傾一杯之水。反擊火怒。立地碎裂矣。若脉帶緩。是胃氣未絕。猶可調理。用四君加山藥。引入脾經。卑補脾陰。再隨所兼之症治之。土能生金。金自生水。水升火自降矣。



虛損肺脉。豁大者。須防作瀉。

江篁南云。得之好內者。其脉芤而駛。真陰損。熱內生也。緩而弱者。重傷于苦寒劑也。

汪石山云。凡見數脉。難治病。久脉數。猶非所宜。脉或浮瀋而駛。或沉弱而緩者。脉之不常。虛之故也。虛損轉潮熱泄瀉。脉短數者。不治。

### 損脉致病次序

扁鵲曰。損脉之爲病。若何。一損損于皮毛。皮聚而毛落。二損損于血脉。血虛不能榮于藏府。三損損于

肌肉肌肉消瘦。飲食不能爲肌膚。四損損于筋。筋緩不能自收持。五損損于骨。骨痿不能起于床。反此者至脉爲病也。從上下者。骨痿不能起于床者死。從下上者。皮聚而毛落者死。

又損脉損証

扁鵲一呼二至。一呼一至。名曰損。人雖能行。獨未着床。血氣皆不足矣。再呼一至。再吸一至。名曰無魂。無魂者當死。人雖能行。名曰行尸。

治損法

扁鵲曰治損之法若何。損其肺者益其氣。損其心者調其榮衛。損其脾者調其飲食。適其寒溫。損其肝者緩其中。損其腎者益其精氣。

五臟逆傳致病訣

汪石山云。余治一人。年二十餘。病欬嗽。嘔血盜汗。或腸鳴作泄。午後發熱。診其脉細數無倫次。語之曰。難經云。七傳者。逆經傳也。初因腎水涸竭。是腎病矣。腎邪傳之于心。故發熱而夜重。心邪傳之于肺。故咳嗽而汗泄。肺邪傳之于肝。故脇痛而氣壅。肝

邪傳之于脾。故腸鳴而作泄。脾邪復傳之于腎。而腎不能再受邪矣。今病兼此數者。死不出旬日之外。果期而歿。所云邪者。因自病之極。不能自安而。侵凌于上也。

虛損死証

經曰。肉脫熱甚者死。嗽而加汗者死。嗽而下泄上喘者死。嗽而左不得眠者肝脹。嗽而右不得眠者肺脹。俱爲死証。

靈樞云。皮寒熱不可附席。毛髮焦。鼻稿。腊不得汗。取

三陽之終以補手太陽。

肌寒熱者。肌肉毛髮焦而唇稿。脂不得汗。取三陽于下。以去其血者。補足太陰以出其汗。

骨寒熱者。病無所安。汗注不休。齒未稿。取其少陰于陰股之路。齒已稿。死不治。厥亦然。

劉河間曰。虛損之疾。寒熱因虛而感也。感寒則損陽。陽虛則陰盛。損自上而下。治之宜以辛甘淡。過于胃則不可治也。感熱則損陰。陰虛則陽盛。故損自下而上。治之宜以苦酸鹹。過于脾則不可治也。自

上而下者。繇肺而心而胃。自下而上者。繇腎而肝而脾。論曰。心肺損而色散。腎肝損而形痿。穀不能化而脾損。漸漬之深。皆爲虛勞。

寒熱論

汪石山論寒熱互發者。蓋氣少不能運行而滯于血。分故發熱。血少不能流利而滯于氣。分故發寒。仲景云。陽入于陰則熱。陰入于陽則寒。是也。寒則戰慄。鼓頷者。陰邪入于陽分也。熱則欬痰不已者。陽邪入于陰分也。此則陰陽兩虛。故相交併而然也。

慎齋云。傷寒寒熱往來。係邪在半表半裏。內傷寒熱。係血氣兩虛。氣虛則發熱。

凡肌表發熱。皆邪陽勝正陽虛也。用黃芪附子。所以助陽。蓋陽氣既虛。黃芪性緩。不能到表。須得附子。雄壯之氣。引芪直走于表。助之成功也。

### 五臟致傷

靈樞云。神傷于思慮。則肉脫。意傷于憂愁。則肢廢。魂傷于悲哀。則筋攣。魄傷于喜樂。則皮稿。志傷于盛怒。則腰脊難以俛仰也。

虛損致病之繇

褚先生精血篇云。男子精未通而御女。以通其精。則五體有不滿之處。異日有難狀之疾。陰已痿而思色。以降其精。則精不出而內敗。小便道澁而爲淋。精已耗而後竭之。則大小便道牽通。愈疼則愈欲。小便愈便則愈疼。又云。女人天癸既至。踰十年無男子合。則不調。未踰十年。思男子合。亦不調。不調則舊血不出。新血誤行。或漬而入骨。或變而爲腫。或雖合而難子。合男子多。則瘀血虛人。乳產衆。則



血枯殺人。觀其精血。思過半矣。

立齋先生云。夫月水之爲物。迺乎太陽乎少陰二經主之。此二經相爲表裏。上爲乳汁。下爲月水。爲經絡之餘氣。苟外無六淫所侵。內無七情所傷。脾胃之氣壯。則衝任之氣盛。故月水適時而至。然有面色痿黃。四肢消損。發熱口乾。月水過期且少。經陰血不足。非有餘瘀閉之證。宜以滋血氣之劑。徐培之。使經氣盛。水自依時而下。

又云。凡放出宮人及少年孀婦。年踰三十。兩膀作痛。

而膚不腫。色不變。或大小便作痛如淋。登廁猶痛。此瘀血清入隧道爲患。乃男女失合之証也。

丹溪云。腎主閉藏。肝主疎泄。泄藏俱有相火。而其系上屬于心。心爲君火。爲物所感則易動。心動則相火翕然而隨。雖不交合。其精暗耗矣。

亢則害承乃制論

慎齋先生云。在上益下謂之濟。以下犯上謂之亢。水火濟制則無病而多壽。譬若火生亢拒則金氣受傷。而金之子爲水。水能剋火。子報母讐而火反受

其制矣。蓋造化之常。生則必剋。剋則必生。不能以無亢。亦不能以無制焉耳。故又曰。制則生化。所以有病久自愈者。亦亢而自制。剝生復也。苟亢而不能自制。則湯液鍼石導引之法。以爲之助。譬如水固能制火。而腎水本涸之人。豈能以涓滴救其燎原哉。明乎此理。而補瀉運用之妙。自超越于尋常之外矣。

又云。人之一身。生死係乎脾胃。凡傷寒雜病。一七後。只當于脾胃求之。始免殺人之咎。東垣云。補腎不

若補脾此之謂也。然調理脾胃之法。須明五行化氣制尅之理。譬如木乃水生。獨水不能生木。水爲木之母。尅水者土。則土爲木之父。水土相兼。則少陽木生。此河絡生成之義也。若脾土衰耗之人。金失所養。水枯火熾。木且成灰矣。

凡補瀉法。瀉其有餘。因不足者瀉之。補其不足。因有餘者補之。譬如木盛。因于肺虧。當瀉南方以制肝。使火無相尅。則肺自清。金衰。因于火盛。火盛則水虧。當補脾以養金。則水自生長。蓋土常不足。最無

有餘。氣血貴于中和。偏勝者。乃邪傷也。瀉其有餘。是瀉邪也。補其不足。是補正也。氣有餘者。非氣也。火也。初因氣不足。漸化爲火。燒燦真陰。爲害滋大。人之一身。以血爲主。血以氣爲先。當補血中之氣。四物加肉桂。補氣中之血。保元湯加減。治病不可忘血。亦不可忘氣。忘血則四肢不能用。忘氣則體無管攝。平和之藥。氣血疏暢。宜多不宜少。寒熱之藥。不過却病。宜少不宜多。多則大傷脾胃。虛中有實。正虛生實。邪寔中有虛。寔邪繇虛至。寔以瀉爲

補虛以補爲瀉言不能盡學者研究之可也東垣脾胃論盛衰用藥禁論豈可不熟讀乎

虛損誤藥之辨

凡得勞心嗜慾七情飲食縱酒饑飽過度此內傷也初不自覺久則成患以致身熱頭痛惡寒或因微熱脫換衣服湊理不密易感風寒症類傷寒實非傷寒醫不明此驟用麻黃紫蘇荊芥大發其汗熱未退仍以寒涼瀉火之劑下陷清氣濁氣轉升故下腹滿又大下之故中愈不足以致汗多亡陽

下多亡陰。陰陽耗散。死不旋踵。定醫殺之耳。

傷寒發表。汗透而愈。內傷寒熱。間作不齊。發熱而微汗。至頸或臍而還。口不知味。似瘧非瘧。或兼泄瀉。醫與諸傷寒藥不愈。如是者。名曰內傷雜病多端。汗而又熱。熱而又汗。亦頭痛發熱。或自語煩燥。不思飲食。遍身骨痛者。用補中益氣。加羌活。或泄瀉而熱不退。此陽虛也。補中加附子。頭痛甚。加蔓荊子。川芎。或無汗而熱不退。亦補中。或咳嗽痰中帶紅。亦補中。此病裏虛不足。反用汗下。清利。死可待。

矣。內傷病中有泄瀉嘔吐。腹脹疼痛。咳嗽清涕。四君加和中散。無有不效。

元氣藏于腎中。靜則爲水。動則化而爲火。腎者肝之母也。元氣足則肝子足以承乎心。心爲主。神明出焉。元氣不足。心神失養。相火抗拒。脾土受虧。金衰木旺。諸藏皆病矣。唯胃氣不絕。用藥力以培之。庶可幾幸。萬一生脉散用參芪或保元之類是也。但見潮熱。宜補中。火熾宜發。用升陽散火湯。虛而不瀉。宜血分中補氣。保元加滋陰。若瀉發困熱。宜氣



分中補血。保元四君加芍藥。瀉則加炒松花。如自汗乃陽氣虛。加附子。內似火燥。胸中嘈痛。白朮一錢。黃連一分。陳皮二分。神麴爲丸。細小。臨卧時嚼碎。津嚥下三十丸。三日愈則止。久瀉傷腎。用保元兼四神丸。或腹脹和中散。併補中。脉見平和而病不愈。乃藥力未至。不可改換。倘不愈。又脉見細數。緊數。皆邪脉變異。更兼嘔吐。不祥之兆也。又口失滋味。不思飲食。不可誤作胃絕。是內有虛火。當滋生元氣。不可以燥劑助火。蓋總以脾胃爲主。脾胃

四季皆擾常自不足傷寒言陽明有餘因火邪鬱于胃中故瀉胃中之火耳

虛損繇于內傷証與外感相似外感頭疼發熱惡寒其脉浮緊有力宜汗解而愈從表入裏脉洪大大便燥宜和解通利之內傷亦頭痛發熱惡寒其脉緊數無力宜補中加羌防元氣一足邪氣自散羌活領入太陽經而出前証俱退矣不效再一劑自然見汗乃愈庸醫不知此理仍用發表汗至頸而還一旦發似瘧作瘧治之又似痢作痢治之更加

發熱。庸醫無措手處矣。傷寒。脈洪。大有力。內傷。當大似洪。而無力。亦大便結燥。仍用清涼。汗下解散之法。大傷脾胃。則肺已虧矣。咳嗽吐痰。或吐紅痰。又作陰虛火動治之。脾土一損。雜病多端。潮熱似痢。似瘧。且脾虛不能統血。而吐血之症成矣。若因火盛。脾陰不足。血枯之症。亦不可用滋陰劑。當用救陰之法。陰從陽生。陽從陰長之義。人參。白朮。蓮子。五味。甘草。白茯苓之類是也。惡心。加乾姜。不思飲食。加砂仁。胸中氣滯。加陳皮。泄瀉。去陳皮。汗多加

白朮黃芪。惡寒加肉桂。吐紅去桂。若泄瀉而諸藥不愈。胃虛難受藥者。陳臘肉。骨灰。陳米。銅焦。共三分。炒松花一分。米糊丸。人參有輕重。虛寔用之。煎湯送下。六七十丸。此法活人多矣。

虛損秘訣

虛損之起。或久遇勞碌。損傷元氣。遂發熱。漸至咳嗽。或傷風失治。或治之不當。亦成此症。或傷寒汗下失宜。久之遂成寒熱之証。或饑餓傷脾。飽食傷胃。治之不妥。亦成此証。大凡百病後發熱不止。皆成。

此証是皆陽氣虛弱。倒入于內。便化爲火。而發熱也。須月保元四君加黃芪。再加乾葛以開肌。紫蘓以開皮毛。病未多日者。服十五六劑。則自然汗來。譬如夏天鬱蒸。一。二。日。或三。四。日。遂大雨方涼。陰陽和而後雨澤降也。又如秋冬陽氣降入地中。則井水溫暖。至春夏陽升。則天地和暖。萬物生化。井中水冷徹骨矣。何內熱之有。損病初發。十數日間。未經寒涼藥。可用火鬱湯升陽散火。湯及補中益氣湯。若久之。則火鬱湯不宜用矣。保元四君繼

之。此爲第二關。蓋元氣已虛。只助陽氣。不宜散火。誤以當歸地黃補血。并黃柏知母苦寒有形重味。反傷無形陽氣。陽氣愈弱。愈不升發。陽絕則陰亦隨之而絕。損病之死。職此故耳。

損病六脉俱數。聲啞。口中生瘡。晝夜發熱無間。經云。數則脾氣虛。此真陰虛也。此第三關矣。則前保元四君子劑。投之皆不應。須用四君加黃芪山藥蓮肉白芍五味子麥門冬。煎去頭煎。不用止服。第二煎第三煎。此爲養脾陰秘法也。服十餘日。發熱漸

退口瘡漸好方用丸劑如參苓白朮散亦去頭煎  
晒乾爲末陳米鍋焦打糊爲丸如藁豈大每日服  
二錢或上午一錢百沸湯下蓋煮去頭煎則燥氣  
盡遂成甘淡之味淡養胃氣微甘養脾陰師師相  
授之語毋輕忽焉

### 損病湯藥加減法

有汗用黃芪蜜炙無汗煨用胃虛米泔水炒用表畏  
寒酒炒糟雜乳汁製表虛芪多瀉火生甘草熱盛  
芪草多無汗加乾葛防風升麻柴胡久病熱不退

去表藥只用保元。血虛加當歸。脾虛加白朮。渴加麥門。五味。虛煩亦加。不睡加酸棗仁。頭痛宜補中益氣。加川芎。蔓荊。小水不利加牛膝。茯苓。心神不安加茯苓。遠志。酸棗仁。退火多用參。芪。虛而動火少加炒黃柏。小便不通或赤或白用黃柏。知母酒浸炒各一兩。肉桂一錢爲末。滾水爲丸。空心服百丸。小便下異物爲驗。腰痛姜汁炒杜仲。惡寒加官桂。惡心加乾姜。自汗虛寒加附子。內傷發熱不退莫如補中益氣。加附子。芪。草倍之。甘溫除大熱。故



也。腹脹恐成中滿。補中加附子。姜桂。吳萸。青皮。芡神。麴。枳殼之類。隨手用之。虛浮加羌活。防風。茯苓。風能勝濕。故也。去病之藥。不可多服。恐泄真氣。人無氣不生。氣常有餘。血常不足。前藥皆補血中之氣。血無氣不行。須用保元。獨陰不生。獨陽不長。保元者。保血之元氣耳。

人稟天地之氣。猶恐陽陷于陰分。常使胃氣有春夏之令。故宜大升大舉。使清陽發腠理。濁陰走五藏。是也。蓋人以血爲主。胃廼生血之源。若元氣不足。

陷于陰分。則通身化爲虛火。變異無常。人死莫知其故。何也。人天庭屬陽。下體屬陰。天庭一倒。其死卽速者。上陽不生。而陰氣絕也。故天之陽氣上升。卽地之陰氣不絕。人之陽氣升舉。卽血之陽布于四肢。何病之有。倘陽一不升。則氣凝澁。諸病生焉。聖人固不過升降浮沉之法耳。

虛損諸病。久之皆屬脾虛。脾虛則肺先受之。肺病不能管攝一身。脾病則四肢不能爲用。謹養脾氣。惟以保元氣爲主。或前從瘧痢吐瀉變症。總從脾胃。

治則保元兼溫肺。勿用血藥。蓋縱有雜症。火起不  
必去。火有痰。不必治。痰宜參苓白朮散。加減。腹痛  
加乾姜。腰痛益智吳茱萸少許。中腹疼痛亦宜胃  
不思食。加砂仁木香。噯氣神麴。腹脹和中散。加六  
君子。久病以溫補爲主。病急則緩治。攻則散離。書  
曰。大毒治病十去一二。中毒治病十去其五。無毒  
治病十去八九。

慎齋先生內傷治法。凡邪火逆行。上乘脾位。用吳茱  
萸炒黃大者。以黃連瀉火歸于其位。所以木沉則

火降也。

凡內傷清氣下陷。陰火在上者。若用寒藥。則陽愈陷。火愈熾。火尋竅出。虛者受之。或目痛。或耳聾。或齒痛。從其虛而攻之也。

湯方門

保元湯

人參 一錢

黃芪

炙一錢五分

甘草

炙一錢生三分

加煨姜三片。黑棗二枚。去核。水二茶鍾。煎八分。空心服。

四君子湯

人參 一錢

白朮 一錢五分

白茯苓 一錢

甘草 炙八分

異功散

即四君加陳皮

六君子湯

即四君加陳皮 一錢

半夏 湯泡五次曬乾切片一錢

補中益氣湯

人參 五分補氣之血

黃芪 炙一錢補氣中之氣

甘草 炙七分

當歸 三分

陳皮 五分

白朮

七分

升麻

二分

小柴胡

三分

七味白朮散

治中氣虧損津液短少口舌乾渴或

口舌生瘡不喜飲冷或吐瀉後口乾最宜服

人參

白朮

木香

甘草

藿香

白茯苓

各五分

乾葛

一錢

四物湯

當歸

川芎

白芍藥

熟地黃

八物湯又名八珍湯

卽四君四物合

十全大補湯

卽八物加黃芪 一錢 肉桂 五分

和中散

乾姜 三兩炒黑脾家藥 肉桂 一兩五錢腎家藥

吳茱萸 五錢鹽水炒過肝家藥

右爲末治中寒腹痛或寒瀉清水或飲食傷噁麤  
氣或久痢寒虛 俱用苦烈好大酒頓半熱一杯

調下五分

生脉散 孫真人製

麥門冬

五分去心

五味子

三分人參一錢

升陽散火湯

甘草

生二錢炙三錢

防風

二錢半

柴胡

八錢

升麻

葛根

白芍

羌活

獨活

人參

已上各五錢

每服五錢水三盞煎至一盞去粗熱服忌寒冷物及冷水月餘

東垣云陰覆其陽火不能伸宜汗之經云體若燔炭汗出而散者是也

脉弦而數者此陰氣也風藥升陽以發火鬱則脉



數峻退矣。凡治此證脉數者當用黃柏少加黃連。川柴胡蒼朮黃芪甘草更加升麻得汗出則脉必下。廼火鬱則達之也。

### 柴胡升陽湯

治男婦四肢發熱筋脾熱骨髓中陽發因熱如火燎捫之烙手四肢熱者屬脾土熱伏地中此病多因血虛而得也。亦有胃虛過食冷物冰水鬱遏陽氣于脾土之中。經曰火鬱則發之。

升麻

葛根

獨活

各三兩

防風

二錢五分

生甘草

二錢

柴胡 二錢 炙草 二錢 人參 五錢 白芍 五錢

右咬咀每服半兩水二大盞煎至一盞去查溫服  
忌食寒冷

### 東垣火鬱湯

治五心煩熱心火下陷鬱于脾土

升麻 葛根 防風 柴胡根 炙草 白芍藥

各半兩

右咬咀每服三錢或四錢水二大盞入蓮鬚葱白  
三寸煎至一盞去查溫服

已上三方宜于初發熱之時。未服藥之前。元氣未傷。服之若神。若已經服過寒涼。已傷元氣。火氣亦餒者。服此反禍于人。無益也。蓋虛損初時。可以發之。故勞證內。已上三方不預焉。

癆瘵門題辭

石震

慎柔師所謂自下而上者。勞症多係水枯火燥。故特舉其大凡。而內有命門真陽衰者。未嘗不仍用壯火之法。惟真陽衰。故虛火旺。其源未嘗不合。自在按脉識病者。臨時之善別。而讀書明理者。平日之善會耳。至險怪之症。于勞瘵迺脩。旣爲一門之顓臾。不可不竟其詳。雖世人不恒犯。而適有犯者。豈可無一法以待之。此先聖賢已創于前。而慎柔之婆心。固不厭繁委次第。以脩全覽。夫著書之難。古今通患。千慮一失。

孰能無之。在學者諒其初始之苦心。而踵事增華。自  
所望于高明君子耳。予與顧子特仍其舊聞。稍加刪  
潤。未敢以意爲補竄也。